

四庫全書

集部

欽定四庫全書

集部

陶學士集卷三

詳校官中書臣呂光復

中書臣劉源溥覆勘

覆校官中書臣朱鈐

校對官助教臣黃昌祺

謄錄監生臣羅翹遠

謄錄監生臣劉宗望

欽定四庫全書

陶學士集卷三

明 陶安 撰

五言律詩

送王克敏赴安豐錄事無簡元中宣差

同入南宮試逡巡愧不才都城留字別昇郡寄書來寒
雪森松檜春陽活草萊長官煩問訊東楚憶持杯

題孔隱君挽詩卷

居 溧陽

墓木年來拱庭蘭日有芳與君雖不識聞譽亦堪傷田

宅金淵在源流泗水長禹鈞陰德厚遺緒未茫茫

輓明威將軍遜都臺公

酒罷耆英社官辭上將壇龐眉年冉冉幽宅夜湯湯芝
砌生餘馥蘭亭藹舊歡傷情人不見塵鎖虎皮鞍

輓發蒙師何益甫先生

諱友聞

晚徙古城東清貧四壁空乾坤同逝水林壑老西風大
夢超浮世行蹤在泮宮嗚呼今已矣揮淚寂寥中

題楊生詩集

字子直

洙泗既刪定漢魏漸浮華貴不失情性當知有正葩楊
生吟調古老子喜容加白壁磨來瑩何難成一家

送易長卿二首

南仕衣難綠東歸鬢欲皤儒流淹贊佐官事輟吟哦春
動芝蘭砌秋澄菡萏波長官前進士降揖禮容多

椿庭山不老棣館祿方新顧我知名久逢君問話親琴
書藏舊物碑畫撫奇珎烟浪垂虹晚東吳見故人

次宿遷

過盡長淮北黃河繞故城順風催客去新凍阻舟行酒
薄情偏洽魚肥價轉輕沂州彭別駕隔境誦廉明

途中偶書所見

碾輪臨古道橋柱卧枯壕墻曝棄皮紙鍋炊棗肉糕賣
魚携網袋牧馬絆槎槽別有傷神處屋空人已逃

東莞道中

沂水縣

魯地多黃壤沂源出碧岑雪殘靴跡淺沙軟轍痕深蒿
火烘蕎餅麻袍護絮襟過山方入縣雲冷日沉沉

入臨朐境

宿遷離半月方度穆陵關到府八百里驅車千萬山路
雖多險峻身不倦躋攀沽酒投村店相看一破顏

自大關至小關

山徑多盤折無勞怨苦辛深巖不見日凍雪幾經旬衣
薄肌生粟輪馳眼翳塵想應慈母意日日念行人

過臨朐

古駢邑

涵橋臨古堞駢邑據平行到無山處方知有路多客

遊何慷慨霸業久消磨
烟樹斜陽裏遙聞晚唱歌

臨淄道中

晨起不梳髮出門天未明
路迷尋轍跡村遠絕人聲
淄水滔滔逝齊城杳杳迎
兩層高白塔不似霸基傾

客途歲晚

風雪一年殘功名半紙難
心勞杯量減腰瘦帶圍寬
草檄牽驢飼蒿薪煮鯽餐
韡泥即拂去旅宿且求安

次東無棣

土屋老荒苔豐年亦可哀塔簷飛十級城址擁孤臺雪
積馳蹄陷雲輕鳥翅開縣庭貧少府舉酒更憐才

送雋彥誠赴官紹興并寄徐國賓

省榜名同薦雲泥勢却殊文章動明主字收選英儒聯
桂榮珂里芳蓮滿鑑湖屢氓應感惠好是礪廉隅

問訊徐高士京華別幾春白衣瞻座主赤子慕慈親月
露篇章在雷霆號令新故人歸舊隱不得寄書頻

送人赴幕職

浙西第一縣幕下捻諸曹興逐雲山遠心忘案牘勞寫
詩嘲月兔呼酒擘霜螯應有寬民策方知贊畫高

送人赴浙東

處儉愛蘼淡嗜經如蔗甜香煤浮硯沼短燭照書簾鮎
岸漲春雨鱖潮沃夜蟾十年交誼厚兩地別懷添

富春山僧隱居

林壑幽閑處烟霞卜築緣寸心空萬慮丈室現諸天香
掬曇花露清疏茗樹泉冥飛逃世網尚友子陵賢

題劉履道行卷

處州人太平儒學正

分得梅溪派湖臯潤澤深
藜烟照書閣芹雨沐儒林
白髮寒羶夢青山故國心
園亭好蒼竹幾度望佳音

大本監郡以詩見惠次韻二首答之

治功思渤海文氣愛相如
架插牙籤軸家藏玉璽書
有恩施郡邑無暇問田廬
武備新嚴整民憂頓掃除
守土逢多士哦詩得自如
威行軍壘服名在御屏書
膏雨滋禾隴炊烟起草廬
胸懷尤洒落窓草不芟除

書事五首次郡侯韻

耕桑田野近戎馬路途長有職居危地無心入醉鄉良
民新習戰役戶重遭傷正待汾陽輦功庸輔李唐

戈船明粉黛羽檄叩轅門苗卒藏深邑彭營掠近村錦
綾裁袴窄銀鏹滿囊存時事今如此何人不斷冤

古昔兵農一方今此法成忠勤爭禦侮字牧必留情牛
酒行郊勞熊羆聽鼓鳴倘非明紀律未見有功臣

郡境多供給官軍屢往還金錢輕似土芻粟委如山隨

處無生意憂人損壯顏
月明依舊好城下照溪灣
海道人多變高郵使不還
招安須爵祿恩德重丘山
志士空懷憤生民每慘顏
幾回思隱遯結屋釣江灣

幽居十首次監郡韻

幽居無限好托興在雲林
蘭氣山軒淨槐陰石迳深
霜螯肥斫玉臘酒滿浮金
對景皆成樂逍遙物外心
幽居無限好松竹翠成林
放鶴高天濶尋仙古洞深
棲身三畝宅絕念四知金
舒卷隨時異非無愛國心

幽居無限好猿鳥語高林歲月催人速烟霞得趣深葱
裾曾織翠荔帶已圍金富貴尋常事安能動此心

幽居無限好談笑坐書林邊塞軍聲遠漁樵友義深靈
芝粲紫玉老桂嗅紅金湛湛真何似明蟾照水心

幽居無限好夢不到瓊林菜甲珊瑚脆松根琥珀深勤
催耕隴犢頻費買山金不逐浮雲變能堅鐵石心

幽居無限好流水繞疎林教子書囊富留賓酒盞深閑
添詩裏畫儉有俸餘金石上閑琴操悠然太古心

幽居無限好爽氣挹蒼林採藥穿雲遠烹茶汲井深林
存題卷筆筭出鬻書金時有馴鷗狎忘機靜此心
幽居無限好倦鳥喜投林野韻思高古公文厭刻深
鼎彝三代器酒食二疏金目送飛雲遠還存濟物心

幽居無限好萬物揔林地僻琴魚樂門閑草木深文
光分北斗人品重南金門外鶴書至恬然不動心

送汪朝宗四首

越東無敵壘海右駐王師相國徵書至郎官匹馬馳雙

溪吟月露萬里撫邊陲指日山陰道風流玩墨池

王夏諸賢俊煩君寄好音數書飛示我千里見同心賓
幄謀猷遠經筵啓沃深金華山水地何日共登臨

東浙多佳士才名我所知居然晉風度重見漢威儀別
久心相憶年來鬢已絲此行勞問訊共約佐明時

蕭相收圖籍功成有足稱聖謨能不墜王業勃然興辟
蠹芸常在登龍士必徵諸公若留意文會盛金陵

啜茶

穀雨芽方茁色香俱絕佳中濡汲江水上品到山家不
見周公夢何煩陸羽誇精神太清爽終夜剔燈花
天地有清氣古今無此奇幽人耿不寐浮世足深思舌
本餘香在牀頭古易知松風猶滿耳真樂有如茲

偶成四首

文何為小技理有未全明妙在無夸靡悠然寫性情句
泉常澹泊五味撚調成垂老方知此譏予必後生

八珎羅水陸五采繡文章美矣孰無好用之非可常古

今天地運晝夜日星光何必驚人眼相看共久長

清河追鉅耨老牧步潮州全氣有虞子餘風挹靜修居
然成典雅正不在雕鏤更有神交處淵源沂魯鄒

博學草廬翁還存荆陸風歐黃皆後出繩墨是良工南
土文華盛中州景慕同九原不可作我亦老江東

三月二日晟生朝賦詩

上巳前一日生辰願百齡乾坤幸賦質晝夜必研經戴
禮承高躅韓文挹遠馨分陰尤可惜修業寄幽庭

送汪一初歸淳安二首

地雖隣險要天獨厚仁賢兵革十年久祖孫三世全
雀橋雲出水雉嶺雨肥田已遂南歸計令人一黯然

繼粟養君子倚閭煩老親家山頻入夢泮水再逢春
人傍綠陰去沙明錦色新清名留省闥時至道還伸

送林彥明回括兼簡劉伯溫胡仲淵

為客二千里離家五六年詞垣開省掖賓席擁樓船
巢水栽花地蒼山種粟田歸心何浩蕩執手重留連

伯也溫如玉仲兮清比淵懸知佳會近煩以遠音傳同
郡成三傑懷人共一天贊興邦國業幸有主君賢

哭胡通甫參政

名大海

步戰勞江北仁聲誦浙東妖兵生肘腋行路盡哀恫列
祀忠臣廟無慚古將風青油戎幕在虎旅氣仍雄

哭王用和郎中

名愷姑孰人

苗頑迷逆順草竊陷忠賢寂寞金華省凋零綠水蓮有
兒同死難無路得生旋建業南城外傷心指墓田

苦齋二首

為章三益憲僉賦

先生於此樂舉世最難堪
堅守心無變方知味轉甘
檠皮冰共嚼熊膽劑能諳
大任從天降勤劬棄宴酣
襄陽有高節涑水更清修
愈病思良藥勞生遂遠猷
飽瓜緣篠架橄欖共茶甌
見說齋中叟年來蔗境遊

病後

飲水味吾易秋江亦讓清
寒初身欲蟄病後髮重生
乞米親書帖淹菹未消罌
高天風露潔庭菊晚含英

送薇

園中紫薇發枝宿枿五月荅開盡八月乃已相對日久惜其凋瘵作詩送之

敢依華省地未結玉堂鄰
樹石借餘韻夏秋常一春
故添荒境麗似掩老夫貧
時物還遷變臨風感慨新

自適

艾炷乾尤熖著莖老盆神病多踈
世故欲寡樂吾真秋祀鄰賒酒晨炊婢
析薪掩書休目力枸杞薦茶新

秦淮寓舍

官久忘羈思門幽類隱居
犧圖天地象鮒壁帝王書
秋

徑霜前菊朝盤雨後疏西風吹短鬢歸夢鴈來初

習靜

雙闌曉來闌一天秋氣清雨溪分硯水風木厭瓢聲習
靜調冲氣耽書老此生上官詢近候片語對真情

晚晴

江上秋陰薄晚風生樹顛高塵捲蒼靄歸鳥度青天牧
馬平蕪野捕魚斜日船千村新稻熟茅屋起炊烟

自樂

廣大者天地中間著此身道從無意得心與太初鄰
咽息靈龜飽隨時尺蠖伸步行騶從遠林叟或相親

遠意

誰謂羲農古朝朝眼底人青天不改色滄海幾揚塵
靜看松梢月孤吟石洞春年餘不飲酒掬水味偏淳

寄孔僉憲二首

驄馬出門早天清霜滿林有官簪白筆無欲賤黃金
愛此雙溪月知人一寸心同僚得佳士來聽杏壇琴

元凱春秋癖愚溪鉅鉏遊遺文照千古之子逼前修別
久思刮目憂來獨倚樓倚樓人不見江雨鴈聲秋

寄人二首

燈照秋蛩壁帷開白鷺車溪山遠天末消息近來踈慷
慨安邊策公平考績書郊行勤問俗歡意動茅廬
暇日費吟思新霜添鬢華還期大雅作頗厭晚唐葩未
雪梅千樹纔晴月滿家登樓尋八詠應笑昔人誇

寄題清高亭

為章三益賦

不受塵所濁應無物與齊一天秋月爽千嶂曉雲低汲
水瓢堪飲乘風杖獨躋超然胸次遠境勝暢幽棲

夜歸

黃昏出華省禁鼓起高城嬌婦鄰西泣棲烏枝上驚一
窓疎雨響半夜薄寒生感客不成寐淒風廐馬鳴

龍灣舟師二首

江水西南急樓船十丈高英王今自將甲士氣俱豪天
濶雲帆展龍光掣寶刀繽紛過鸚鵡呼吸息鯨濤

周郎戰赤壁楚羽刎烏江江漢為南紀相將入大邦龍
驤迷雪浪翼以萬鋒艘士馬環城處嬰兒繫組降

自效

出入兵戎裏揮毫代執戈病餘身易老日短事偏多山
月出青靄江風生白波心專圖報效才薄愧蹉跎

鳳池

秋冷鳳池波凭欄照影睹乾坤渺無際老覺此身多霜
雪浮青壁江湖夢綠簑干戈何日罷玉燭四時和

癸卯九月二十一日作

立冬前一日雷電蟄蟲驚雨氣蒸人暖潮頭觸岸平君
王敬天變宰相訪民生穫稻築場圃千村正望晴

立冬

乍寒冬氣應此日雷電收風力生東北天兵沂上流憶
君親沐雨愧我已重裘只待青天霽聊寬下土憂

懷友

霜月清無際溪山翠滿庭英風擊蛇笏標致換鵝經一

自東南去千巖草木青
知心人渺渺添我鬢星星

霜露

霜露應時降年年生客愁
長懷舊塋域不得省松楸
落日青山遠淒風老涕流
縈心皆國事無暇為身謀

冬初

木落山多石霜嚴水不潮
一時何凜凜兩鬢易蕭蕭
驚鵲巢難穩冥鴻路已遙
街頭新炭貴冷室意無聊

寒夜

書几殘燈在房櫳清夜徂高鴻叫雲冷明月照人孤銀
箭遙傳漏紅金不到爐擁衾纔瞑目飛夢滿江湖

免咎

舊帙丹黃昧新釐碧綠淹藉茅期免咎咽李恐傷廉病
退仍求藥神清少食鹽每逢同志語相勉律身嚴

釋疑

人喜聞人過我唯攻我疵狐冰疑自釋魚水樂相知官
府新文積邊城遠檄馳長沙言切直前漢賴扶持

遣愁

默守此心定仰看孤月明
憂來多為國老去豈偷生
將校乘時奮乾坤有日清新霜寒太驟舊絮曉來輕

聞上江消息二首

義旗西指鄂不戰沛仁恩
拓地荆襄漢降王祖子孫
米鹽通澤國圖籍會轅門
全據長江險京陵勢愈尊
歸義諸文武隨軍到里閭
城池今異代妻子復同居
全國兵家尚安民治體初
英雄平海宇仁厚是權輿

寄豐叔良二首

見說郊居好行吟野趣多溪魚曾上活山鳥酒邊歌雪
屋炊紅米秋江老翠蛾幾回時序換奈此別離何
阿咸九月到寄我尺書看盡日不釋手空江頻倚欄鄉
山微雨外客夢一窓寒遙想林泉勝無憂寢食安

寄錢彥良二首

離羣憶鄉里知子歷艱難博士官三考空齋食一簞江
風吹鬢濕竹雪照衣寒清氣相酬酢新詩正耐看

壚亭舊時月兩地照分離
歲久無音信人來每問知
蟬磯息烽火鷗渚淨漣漪
縣郭茅茨密遺民喜得師

寄潘章甫二首

每懷文學掾絕類玉堂仙
家有雙峯記書經五世傳
風搖秋案燭露洗曉池蓮
古卷存廬舍無時不誦絃
捻角真英物回頭已壯齡
文生新句語動合舊儀刑
臘雪松梅在朝槃寂粟馨
聖模勤玩索吾老重叮嚀

寄示從子旻二首

舊居數椽屋昔別八經霜兵後琴書少城南畝畝荒家
傳存朴素兄老喜安康久病吾衰矣唯期汝自強

東郭多佳阜西風息戰塵故家丘隴在經亂樹為薪歲
久羈人遠霜寒節序新無由親拜掃悵望淚沾巾

寄示馬甥希穆

昔當童冠日從我久留連轉首二十載游心先後天別
來踈戚里悵望舊山川遙想寒窓夜耽書不受眠

寄陳一飛

月朗荷苓屋秋香桂子林相違三隔歲未得一論心中
筭應藏藁書籬不貯金欲思黃鵠舉當惜白駒陰

省中夜直

長廊羣掾散從者煮茶供寒雨連深夜清灯照瘦容明
生白雪壁響度順風鐘松火爐中燼神清睡不濃

讀易

理自無形著辭因有象陳冰霜寒閉野天地暗回春位
衍生生數著存七七神吾心如脗合何物不彌綸

阿壻二首

阿壻方四歲學誦五言詩頭聳骨如角情鍾翁所奇候
門迎馬到哭妹感人思夜夜燈前看寬懷有此兒

時時思祖母啼向素幃前近者吾衰甚聞之涕泣然一
心期汝長八世嗣家傳幸有書巢在成才望老天

與負外黃觀瀾李彥章試士西掖

王業興家國人才薦廟堂風簾留晷刻冰鑑照毫芒列
坐清儀肅終篇耿論昌願言登用者一一是賢良

冬暖

貧室無衣褐常憂雪霰零天心憐赤子日色盍玄冥
麥便溫土觀梅立小亭北山如媚客聊可敞疎櫺

紀志

讀易四十載玩心毫髮間追尋千古派流入五夫山
述旨情徒切勞生事不閑斯文天若佐暫免綴朝班

野叟二首

為樞史李仲仁作

作史居官府休心類野翁不將文勝質獨與古同風
將

相咨詢後山林夢寐中此身雖案牘幽趣滿簾櫳

避世潛山野輸君隱市朝行年今欲老太朴未全消竹
屋觀晴嶂茶鐺煮午潮獻芹心正切未得友魚樵

癸卯仲冬望日登舟秦淮翌旦過龍灣出大江
舟發秦淮暮西風正面來朝從大江沂風轉兩帆開白
鳥晴逾潔黃蘆冷未摧潮平行正穩幾度見烽臺

晚過三山

寒江浸天影暮色接蒼茫帆落波迎棹船虛月到牀斷

磯成豕突平渚行蛇長黃帽齊宣力知吾去意忙

烈山

空明無所有何物抗吾篙地底雲根湧波心貝闕高四
時繁草木千古任風濤挺立不搖蕩居然一俊髦

櫓港

昔年游此地市井簇人烟水驛官船鼓荅林酒閣絃重
來盡蘆渚何異變桑田回望螺磯在臨流獨悵然

繁昌

午過繁昌邑山雞語近郊戰場枯白骨行徑老黃茅官
廨新臨水人家類結巢鳳凰山獨好寒翠動吟嘲

板子磯

山連陣雲勢飛出大江干亂石紋如斲雙巒影共寒
蟾伴清夜龍口東驚湍愛此瓊瑤窟持杯子細看

荻港

空垣霜蘚濕雞犬四無聞怪樹作人立斷碑經火焚溝
魚爭雪水山鳥啖朝昕信步不知處風林樵運斤

石窩

荻港廢驛東數步山面奇石列如累牕中舍
隙地絕宜作亭予名以石窩徘徊久之愛莫
能去

飛巒立萬石正面俯清波心喜到佳處吾將營此窩江
蕪烟浩蕩野竹雪婆娑凍鵲相看久忘機意共多

丁家洲

季世輕邊備姦臣豈將才妖金聲動地炎火冷如灰營

壘已陳迹山川猶壯哉水流鳴咽處過客每興哀

管生時順昔從予學今為厯官同舟西上

犧圖窺聖秘鳳厯授人時大禮占新歲同行遜舊師
塵千里淨桑梓寸心思西謁軍門後舒州訪故知

銅陵二首

縣市無城堵坡陀枕水濱銅坑寒鑿鑿炭戶曉擔薪
兵後薑芽少巖深箭竹新沙蹊浮石子蔓蔓履聲頻

石塔深巢鳥磚街曲類蛇平山立絛埃小港隱漁槎
田

廢多生荻池湮不漚麻獨存荒鬼殿未有縣官衙

過銅陵述事

偶見綠衣使詢知繡斧翁登程先數日何事滯孤蓬遙
想觀秋浦高吟醉晚風快湏牽百丈追逐與相同

過池陽

一錢有華胄三載守名邦我偶經秋浦無由共夜窓烟
雲浮短樹雪月照空江倚棹西南去應慚過雁雙

題池口驛

孤帆向江漢四野息風塵忽見滿山雪因之懷故人滄
波遙注海凍樹暗藏春他日重來處桑麻雨露新

次安慶

年餘罷爭戰地美類承平茅屋添新戶江流繞舊城關
津遮道問將帥出郊迎天晚烟波闊催行月未明

入彭澤境

疊嶂起當路江從何處來樹梢山廟出草罇石門開淺
浪分流港高空望遠臺唯因陶令後此境盡佳哉

蘄州道中

南來冬不冷山水一春臺未落千林木新開幾樹梅磯
侵江面狹浪擊岸沙摧驛路二千里茲行亦壯哉

使客

平生有詩史行藁出巾箱使客皆千里官船共一觴高
雲飛鶴鶴微雨濕衣裳夜靜未能睡清談對燭光

過道士汭

據牀梳短髮飛霧濕征袍石觸回流急雲棲密樹高買

魚供早饕餮藥出陳醪惜不乘風力吾行亦甚勞

泊巴河

蘭溪行過後迤邐到巴河江狹無磯險沙平有港多鄰
舟同永夜漁火照寒波獨惜年華晏其如道遠何

泊沙口

漠漠寒雲野垂垂暮雨天蒼灣龍尾掉紫石馬肝懸擊
火炊陳米分鹽換小鮮疾風從震蕩終夜自安眠

風雨

剛風吹海立飛雨自天來
洶洶鯨鯢沸蕭蕭鴻雁哀
行人淹道路君子濟雲雷
進止從天意知幾不蹈災

晚至武昌

行至二十日來臨鸚鵡洲
環城屯虎旅伐鼓衛龍舟
新月羞初夜寒雲黯一樓
波間燈影密穩泊且無憂

倚柂

樓船雄帳纛倚柂只遙看
壁上青蠅兩籠中白鶴單
同舟人別去對月夜清寒
江面淒風起悠然夢境安

公子二首

翩翩貴公子年少美風姿坐褥金錢豹盤飧玉面狸彎弓穿射的騎馬造賓墀願汝聞忠孝光華在禮儀

翩翩貴公子新自塞垣歸鵬翅珠璣帽龍紋錦繡衣花前牙板按燈下羽觴飛願汝崇清素農桑業尚稀

野人二首

野人便土物性懶入城中水荇羊鬚白山茶鶴頂紅開窯分賤炭汲井截深筒酒熟邀人飲登盤芋栗豐

野人便土物家計日經營
弋雁乾成腊籠鰕活煮羹
泥肥桑幹密雨濕菜芽生
今歲田禾熟雞豚養得成

文士二首

文士甘藜藿林棲閱歲華
一衾春自足千駟我何加
雨雪欺茅屋乾坤任釣槎
今朝烟火晚帶露採松苓

文士經綸學時來志或酬
玉堂清不夜金鑑照千秋
白髮憂民瘼丹心為國謀
所期功業盛富貴一浮漚

武昌城西觀戰

金匱要略卷之三
殺氣黯沙場呼聲動女牆官軍皆虎奮殘寇尚鴟張火
鏃飛孤壘霜戈出萬航咲渠俄却走垂滅更披猖

寄示晟昱

兄弟年踰冠儒門業貴精別離春忽半生理日須營汝
母遺清範嬌兒動語聲寸心思念切不寐到天明

二月十六日喜晟至武昌

偶傍船窓立驚看雪袂來羈懷三月久歡氣一時回換
米携鹽筴延賓舉酒杯從知家信好病釋岸荅開

已上江行雜詠



陶學士集卷三

欽定四庫全書

陶學士集卷四

明 陶安 撰

五言律詩

甲辰守黃州初至作

初入黃州市蕭然綠樹村刈茅低縛屋剖竹密編門
桃李花零落山川勢吐吞廛民來一二敬喜為溫存

黃岡寓所

霧雨一城暗梨花三月天空梁春蟻墮踈壁暮蚊穿草

密藏枯井苔荒蝕斷碑開門山色好飛翠落吟箋

三月五日歲別東歸

客中離別苦忍淚囑言辭背面南行處臨衢目送之心
隨江水去人與片雲馳歸坐茅茨底凄然老涕垂

邵寓偶成

江月簫聲遠城春竹色斑天文鵲尾次地險虎頭關綰
綬此為郡結茅先對山雨晴聞布穀鬬草未能閑

雨過

雨過山添色推牕翠撲衣
秧隨新水長蝶趁落花飛
江近簷頭掛春從客裏歸
沙乾聊可步倚杖綠陰肥

久雨

十日久陰雨今朝更沛然
尺泥深草徑三月似梅天
剗木承簷溜舒瓢挹井泉
情懷殊不豁寥寞對窓前

憶二子晟昱

客窓風雨冷唯有影隨形
愛子別相遠老懷愁未醒
春殘雙鬢白夜久一燈青
何日團欒處歡情滿戶庭

苦雨二首

皇天日日雨何不憫吾農
冷逼青秧瘦陰添綠樹濃
晚來鳴兩鑊誰與遣頑龍
斷送殘春去無心在酒鍾

斷橋春水隔疎牖
暮雲昏蔓草紫山郭
江濤漲海門泥陳留
鳥跡壁濕亂苔痕
安得愁陰豁晴暉
滿竹輾

追悶

數日情懷惡連宵風雨多
憂來成展轉事至罷吟哦
園樹肥椒子煙叢長薜蘿
一春不對鏡正恐鬢絲皤

偶閑

古堞晴觀漲幽蹊緩踏莎
槐絲低掛蠖桑繭自成蛾
吏散庭花落朋稀野雀過
却思前數載官事蝟毛多

立夏日紀事

近午生微暖殘雲散積陰
朱明新節序綠暗舊園林
暮佐論時政山人獻雅吟
南風來應候解愠快民心

寓所

蓋茅為寓所郡治亦于茲
籬外簾窺吏衣中蟻嚙肥
晝

長無訟牒興到有新詩
早食逢來使齋厨米再炊

窮民

歎息窮民苦勞心
歲不寧家空遭橫斂罪
薄陷淫刑堡寨雄
群甲兵繇役兩丁我
來新典郡哀痛淚交零

旅寄

旅寄存時義居安意自如
風欺窓紙薄雨透屋茅疎
盜息家無犬賓來食有魚
綠陰清晝永愛讀枕邊書

縱步

傍市人家聚瀕江草徑遙燕尋曾到屋魚候未來潮訪
友聊乘興扶筇直過橋晚山煙外見重疊翠如澆

郊外

處處多栽竹家家盡結茅蜜房封蛹戶蠟樹繫蟲包甕
汲泉微濁鋤耕地頗磽傍簷羞草具無粟易山肴

望家信不至

船去四十日家無消息傳江頭人不到客旅眼徒穿當
暑衣無葛慙期榻有氈何當來土物免使貸鹽錢

聞立中書省命左右相國

相國經邦業中書出治原一堂文武並百辟表儀尊自
顧微蹤遠今符素志存十年參侍久喜極復何言

寄董正則諮議

玉署清揮翰彤扉老曳裾懷人搔短髮來使寄長書江
樹春彌望山蟾夜共居剛風吹弱水不得侍雲車

寄羅復仁諮議

遠懷羅閣老爽氣蕩清旻口伐推鄰壘神交厚古人囊

慳道尊貴筆老意清新前席諮詢處遙知鯁論陳

述事

千村新雨過水滿綠苗生蠶麥收成速兵農賦役輕紛
紛挈家室日日到州城訟簡有公暇江山共此清

已上黃岡寓稿

夜泊蘭溪

津吏臨堤問湖官隔水來乘桴新竹貢築室舊民回暮
草蚊飛猛秋雲鳥唳哀長星下天末風露一襟開

過五郎磯

石壁銀光爛當衝似設關雲陰拂樹走山勢隔江環絕頂人稀上飛藤鳥自閑富池蒼隴近百摺枕江灣

盤塘

長峯飛騎突勢欲斷滄江路轉仍無際天高恣倚窓湫流催捩柂山港絕徒杠檣上馴鳥舞迎人覓食雙

彭澤懷古

昔賢才勝福五斗亦難任歸飲柴桑酒忘彈單父琴羲

皇上古意晉室舊時心我愧過彭澤高風不敢尋

過小孤山遇鄒師顏即別

江妃新廟下隊伍耀弓刀半載別離遠一官巡警勞峯
頭掛星漢關口吸雲濤見面即分手舟行月滿篙

空庭

空庭人寂寂環座竹猗猗山淨秋陰薄林深曉色遲案
頭蠅豹捷壁竅鼠狼窺處約還清致湖菱雜飯炊

遷客

遷客辭金馬吟情動草堂公餘秋煮鰕夢覺夜聞簾靜
拄看山笏清梵讀易香江湖蹤跡遠何以報君王

遣興三首

斫竹藩新解鋤茅關古蹊地偏松鼠過樹合竹雞啼信
步來溪上遲留到日西移時忽得句遣興不拘題

鵲立疎晨仗蜂喧聚午衙寓居多澤水吾分合漁樵未
病常儲藥無眠減啜茶從人笑潘岳垂老更栽花

近時來井邑遠跡亦山林每憶君賜食尚期朋盍簪遣

文當述理臨政必清心片語人皆信無煩徒木金

湖鄉二首

泚水新無警湖鄉頗有年稻田驅夜豕蓮蕩捕秋鰯
邏卒黃茅屋歸人白板船數家依綠樹斜日照炊烟

熟處人還聚生涯日漸忙洗魚醺作鮓切藕曝為糧
野紵栽臨屋家鳬浴滿塘掩門兒女坐燈下補衣裳

西風

萬樹舞蒼翠西風終日來一涼衣頓薄何日客當回
候

蟲吟露切秋鶚擊雲開又復悲搖落蕭蕭獨上臺

觀大龍山

山勢何所似大龍飛入雲隔湖來艷翠未晚隱斜曛洞
掩無兵火林深亦斧斤亭西煙霧豁凝望意慙慙

懷原夫

幕中曾對案袖裏祕藏書出處情無異清高我不如入
朝須挿筆進諫憶牽裾江海蒼鬚客同時注起居

懷仲圭二首

天塹古為限江淮今復同國家當盛日臺閣已生風獨
愧辭朱雀無因望玉驄却思薇省夜共剪燭花紅
四方多取友幾載少知音君子溫如玉同心利斷金空
中難寄字客裏易沾襟相會何時再堪嗟老境侵

懷友

分携未一年美秩已三遷執筆螭頭立當廷鯁論宣近
因留遠地獨肯寄長牋五色雲霄上光分寶炬蓮

憶昱

渺予成久別聞汝理生涯初夏出為旅深秋未到家江
風低宿雁晚日閃歸鴉舐犢情逾切令人鬢已華

寄呈從兄松雲翁

別兄二載久介壽六旬餘清健如彊日蕭閑守故居薄
田供伏臘稚子業詩書小弟亦垂老還思到里閭

遣興

門前蒼嶂列身在白雲樓有地學為圃無鄰可乞醯江
天孤影鶴山月五更雞自料殷員外慚非宓不齊

九月朔得晟所寄藥物

人自金陵至兒封藥物來家書千里達旅況一時開病
想丹砂鼎綠慳玉露杯喜看菹醢列鄉味出瓶罍

九月七日雨

兩月晴明久昨宵風雨聲寒催秋色老病怯袷衣輕故
壘低雲黑荒衢濕蔓縈重陽時節近客裏助淒清

秋祀三皇

歲祠當九日大道仰三墳廢邑姑存禮皇風不在文曉

江生白氣秋嶺濕玄雲茅茨土階淨旭日照清熏

秋夜

青燈對無語白月透虛櫺乍冷壁蟲響向風山葉零更
長無乂睡意到索遺經心境有餘寂秋聲自厭聽

人生二首

人生在天地隨寓即為家着處燕營壘行蹤鶴印沙征
衫沾野露舊隱笑溪花還勝陽山令篁茅瘴海涯

人生無百歲功業必乾乾此志不憂國何顏可見天遠

居山邑靜如對玉階前寄語秦淮柳還能記着鞭

蠶蚓

季秋蟄蟲俯蟄蚓尚爭鳴肅殺無多冷喧秋過五更幽
窓常眈夢微物各舒情節候雖成晏天心特好生

蟋蟀

蟋蟀傍吾語秋寒聲更圓蕭蕭風露下切切客窓前催
得鳴機織驚回警枕眠揚鬚頻吐氣無乃甚便便

九月蜂蝶

金八八八八八
卷四
寂寞秋風老紛紜蜂蝶飛年年花落後隊隊日相違玉
翅穿楓葉黃鬚點客衣山中隨意好何必逐芳菲

霧

陰陰似塵起曙色忽成昏綠樹杳無跡青山不在門着
人衣漸濕蔽野豹深蹲還喜清飈發天開放曉暎

晚風

暮秋連日熱向晚大風寒變態如翻手衰容怯倚欄降
霜中氣應吹月上雲端木葉蕭蕭脫淒聲接夜闌

秋雨

秋雨黯彌晝暑寒相代時南方謝絺綌急吹透茅茨萬
舞庭前樹飭勞野外師園蔬承潤澤新綠動離離

夜永

山深無刻漏夜永不知更窓白只疑旦月斜猶未明離
人江北住華髮枕間生孤館此懷寂斷鴻何處聲

雨館偶成

山中三日雨榻上一氈寒野暝雲吞樹溪回雪舞湍孤

飛迷白鳥數點淡蒼巒閉戶空林下蕭條意強寬

遣懷

十朝八九病一世萬千忙未獲康寧福猶馳汗漫場延
齡愛芝朮遊宦憶耕桑習靜心無擾餘生樂未央

復雨

徹夜雨聲急當門溪漲高枯蠅抱野蔓寒雀起林蒿泥
濺新油履風欺舊緼袍邑民應笑我官况太蕭騷

呈至樅陽喜而有賦

宇宙身如寄，星霜歲易周。客鄉驚見面，父子共忘憂。話裏知親舊，燈前問進修。若兄能守舍，此處暫堪留。

寄示晟二首

汝弟來傳說，朝儀熟見聞。克家嚴志操，事主致恭勤。騎射新從武，優閑更學文。令余沈痼釋，覺此老懷欣。今年二十四，稼穡識艱難。處約精神瘦，居安意思寬。星辰天上拱，松柏雪中看。貧富能無累，持身始可觀。

十月七日舟發樅陽

時遷往桐城舊縣

巡官率兵衛父老拜溪亭過鳥雲間白高天雨後青兩
篙撐雪浪幾曲轉沙汀蘆葦風搖蕩寒聲枕上聽

晚宿官段

村墅人新聚經營晚未閑魚梁箔如柵網戶屋依山鵝
鴨喧籬落蒹葭蔽水灣舟中不堪卧借榻叩林關

泊松山湖

風逆湖波涌維舟傍淺沙松山雙石巘茅舍幾人家霜
樹明丹葉寒蔬長綠芽客鄉今夜月伴我宿蘆花

過山家

步跡隨深徑春聲接近村
魚膏燈掛壁粟炭火當門
燕去留空壘雞棲隔密藩
朔風鳴夜永矮屋自春溫

發松山湖

朝雨止還作征人去復留
輕雲微放日近午始行舟
雙島烟波繞重湖晝夜流
白鷗飛適意擾擾見渠羞

晚至白兔河

風雨日來數夕陽晴色初
聊登沙岸步忽到野人居
白

兔何年出黃花夾路舒喜聞郵舍報附至玉堂書

登陸往桐城縣

經歲不騎馬借驢因斷河里行三十五岡度幾重多野
菊香澆袂霜松翠壓坡晡時臨縣郭山色動春和

至桐城縣

閩使留三日慇懃待我來驕驄數里迂大帥尺書裁金
谷生芳草昆明有劫灰市民雖未集官道且重開

桐城即事

東郭澗聲急西藩山勢高
井泥淘白骨礎石鏟黃蒿
新厓林輦過虛廛野雉號
從茲遠兵難庶可息民勞

燈花

卷然鐵如意紅粟結歲蕤
十瓣團葩出孤根密縷垂
寒風吹不動光燄照書帷
黃昏至夜半有喜報人知

甲辰仲冬望日

憶自秦淮別今朝恰一年
山川詩畫裏天地客窓前
節物驚心換行藏顧影憐
屋東寒澗月又見一番圓

冬至

天統書周朔雲祥紀魯臺陽來第一日山下發孤梅與
客嘗杯醕無人候管仄南窓晴色麗齋戒卷還開

官廨北澗偶步

碧澗依山麓蒼松掛野藤泉清見魚泳磴絕少人登龍
井苔封甃鳧田草沒塍舊時豐邑屋廢址接丘陵

聞除代者及召還之命

年殘動歸思客至報除書海內招文學淮南起謫居故

人存有幾短髮病來疎天朗朝陽出能無照曳裾

臘月六日雪

臘天初見雪日午已開晴微暖空簷滴餘英老木擎荒
城無酒賣疎牖照人明風自西南起遙知送客程

昱至桐城二日別去

兒曹各西泝吾亦欲東歸陸走百餘里一見復相違雪
晴沙路軟天闊雁鴻飛新年望還舍柳下浣征衣

臘八日發桐城

卷四
邑人生悵快送別郭東門凍木知春早晴風捲霧昏石
橋分古道野燒露新痕行處山農說留聲到子孫

歸塗紀事

雨收遵水許衛卒擁歸鞍灘淺輕舸滯泥新步履難諸
峯雲樹淨百鷺雪翎乾東渡留宣湛相逢故舊歡

謂張子安

宣湛即事

水退潛魚露洲寬落雁多裹糧山估集擊鼓野巫歌紙
帳春生夢瓷杯夜酌鮑朔風吹雨至行旅歎蹉跎

過樅陽

樅陽舊遊地歸棹此經過
明府勞迎候遺民感撫摩
魚梁開網罟官廨列兵戈
倦客江東去山川在眼多

泊池口作

水陸程俱歷星霜歲欲更
兒孫望人至風雪止吾行
照影蓬窓燭吹香土竈羹
偶然泊池口驚見舊儒生

遇青陽方

叔誠來謁時
為池郡教官

江行新霽

雲開天日明風順水波平
造物憐遲暮今朝快此程
優坐舟子坦坦履夷庚
路過銅陵後山從荻港迎

早發

五更霜月白幾度喚長年
不識歸心急猶耽向曉眠
南風隨畫舫東日上青天
漸見繁昌邑三山立岸邊

過天門山

石壁脫扃鑰倚空雙觀臺
江流關不住閭闔豁然開
雲表群仙望舟中獨客回
欲揮千丈筆題鳳記曾來

望青山

三峯江外出千里夢中來神秀還如昨飄零獨可哀
田園先業在杖履幾時回斜日孤帆遠相思倚鳳臺

泊慈湖

望闕無三舍維舟忽再宵欲晴微露日近晚漸停颺
試起川神語難稽國命招遲明當發棹帶月蕩江潮

入境

船頭難未唱已過數重磯原野新浮霽兒童遠候歸
好

山如故友高鳥笑征衣指顧龍灣近無勞歎久違

已上鶴沙小紀

五言長律

送朱仲良

四十韻

幕府需名掾儒林拔俊髦赤霄麟鳳至華嶽隼鷹高家
譜遺先業功庸在武韜銀符傳爵秩玉樹秀兒曹鄢邑
懷鄉遠鉛山鼓篋勞雨香萱草砌雲湧墨花槽寶劍精
金鑄丈綃獨繭纈朝盤蒼首宿春酒綠葡萄詩社驚風

筆書櫺繼晷膏霞生靈鷲屐雪壓紫溪舸青眼多知己
黃眉又伐毛膺門隆雅遇和璞遂奇遭三語名增重諸
侯禮見褒襟懷澄夜月簡牘析秋毫訪道鷺湖境承光
熊軾旄水晶明窰宅珠玉紀遊遨遠調邊江郡久延中
土豪青山晨靄樹采石暮烟濤槐舍香凝戟蓮漪色映
袍謀猷裨召杜刑罰尚蘇臯駿足仍淹櫪雄姿望解條
雖承毛義檄尚莞子游刀黍稷登商璉笙鏞間舜鼗屈
身班雁鷺挺質出蓬蒿憲署嘉才藝分軺鑒履操抗章

孤薦鶚投釣六連黿要路登風紀新威糾虐饕竹松存
勁節蘭菊著離騷喜動庭闈綵程催水驛蒿諸公聞耿
介列郡息喧嘈烏府霜飛栢龍門浪漲桃功名來袞袞
歲月任滔滔風俗俱廉問泉沙必淨淘宸聰資耳目民
瘼解憂務清鏡方開匣彤弓已脫弣日斜豺虎遯秋肅
草萊薶折檻應當繼乘驄定不逃論交心正切話別首
頻搔癸火炎颺扇荷盤急雨號離筵車馬集錦瑟送芳

醪

己丑九日南軒山長許栗夫邀學官及諸生登
高翠微亭以唐人登高詩前四句分韻賦詩
在座諸生有得開字者余為代賦五十韻

一統江山大羣賢氣量恢客中逢節序雨後踏崔嵬虎
踞城如昨鰲分極不摧臺空鳳凰去秋老雁鴻來天闕
駢雙岫神州見九垓六朝歸感慨萬籟息喧聒鐵甕撐
寒霧銀濤鼓霽雷淮田黃接岸楚樹錦成堆古陌纖如
縷遙湖小似盃千峯無遠近一望悉兼該獵苑平蕪外

漁村別浦隈風淒沙鳥逝雲冷野猿哀梵殿專靈境唐
宮盡劫灰清涼雖美額寂寞亦荒苔曾是興龍地堪卑
戲馬臺佳辰來宴集幽興寄徘徊我喜南軒長名登北
斗魁同官皆俊傑共樂及童孩戶屨何多甚盤飧儘富
哉金蘭深有契玉樹皎無埃泉石留清賞烟霏作勝陪
青天從可幕白日不須頽草坐膝相促觴傳手勿推採
茅噓活炭按菊泛香醅餅剝均充僕桃慳遍數枚參軍
巾欲墜靈運屐遲回遠纈頻生眼微醺漸上腮性情雖

坦率語話絕嘲詆過嶺尋禪榻開軒倒巨壘老僧心火
滅吟叟鬢霜皚身世參寥廓林巒入笑吟寶坊棲萬佛
華蓋擁三台晉塚縈枯蔓梁碑漬古煤楓亭紅點綴蘚
甃綠漣洄舊跡供搜訪新詩費剪裁文華聯鸞鷟駿逸
掃鴛鴦懷璞逢明世懸金致異才雲霄方滿足徑路豈
無媒寶氣生龍劍珠光出蚌胎棲身非枳棘洗髓到蓬
萊醉玩瓊林杏清依玉署梅佳期應不遠流俗詎能猜
小子慙荒陋茲遊覩壯瑰自憐樗櫟質豈是棟梁材獨

傍丘園隱頻驚歲月催菱花晨鏡對楮枰夜爐煨鶴露
常知警鵬風亦欲培麻衣叨與會茱佩更禳災曾結松
筠友仍煩桃李栽願言隨步武閭闔九重開

靳總管新任

字處宜

天子求賢守君侯牧此邦四郊多壁壘五馬建麾幢西
北辭樞府東南控大江黃堂施號令赤子解憂懷昔者
懷才藝遭時選厚庵九龍居得五一鶚薦無雙梁棟資
名植圭璋琢美珏早朝隨仗馬夜館讀書缸臺憲綱頻

振春官禮不吮賦梅心似鐵潤草筆如扛楓陰垂丹陛
徽香透瑣窓繡衣勞遠使寶鼎可輕扛優詔鎮千里深
仁滿一腔岡陵蘇旱畝防岸息奔瀧聲動民謠袴歡浮
社酒缸炊烟噓冷竈甘雨活枯椿羽扇揮能捷鄉兵出
已降花村皆放犢月野不驚危泮水招衿佩天河洗甲
縱陂應千頃貯鐘豈寸筵撞民病憐魚輟途窮濟石砭
瞻依今有地道德啓愚蠢

追輓主簿汪古學

字虞卿名達辰新
安人汪王之後

身為明時出心惟古學稽方期遺一老庶以澤群黎回
首人何在聞名我亦悽有山埋玉樹無路上金閨憶昔
居鄉井逢危動鼓鼙簷深來烏雀海晏息鯨鯢保產身
勤儉治家法整齊教承軻氏母賢有伯鸞妻歷世神明
胄旌門孝節題父天嗟已隔聖域望能躋雅譽尊徽歆
雄詞粲壁奎居然麟一角駿甚馬攢蹄曾次光澄月毫
端氣掛霓輕財好施予引手救顛隲籩豆豐延客饗殮
自薦齏中年方仕進遠轍忽東西化雨滋鄱水文風振

語溪藻芹魚亦樂枳棘鳳難棲職謝雷封薄躬耕雨隴
犁乾坤容放浪軒冕視塗泥載酒尋花塢編籬護藥畦
禮卑皂蓋守詩富錦囊奚物外筇隨鶴人間甕舞雞流
光催袞袞大夢香淒淒著述留殘藁婆娑想故蹊敕筒
香墨在琴榻暗塵迷宰木脩盈拱孫枝皎若圭遺孤今
雪鬢高步上雲梯遊宦羶仍冷論交手屢携傷情歌此
曲南望暮天低

喜雨為靳太守作

仲夏梅霖少人情苦蘊隆兩轡專郡寄千里念農功為
阻新秧綠愁看烈日紅露香深處禱精意上天通不洒
泥龍水俄飛石燕風悠然起膚寸倏爾滿虛空注地除
龜坼翻瓶滴馬鬣火鞭馳列缺雷斧役靈霑溜掛銀綃
閭聲騰鐵騎雄波濤生砌上膏乳漲田中插蒔高低遍
沾濡草木同頻來仍密密欲歇尚濛濛芋圃添新葉瓜
畦長暗叢間閭清疫癘老稚解憂忡大慰雲霓望欣聞
畎澮充壤歌渾易接米價頗難窮野路收黃潦江潮注

采虹桔槔今不用稼穡必全豐德澤流三縣休徵出寸
衷名亭蘇太守憫雨魯僖公珠玉非為貴倉箱可待崇
從知祈福祉不在走祠宮郡舍涼陰重溪城瑞氣融買
牛如渤海興學見文翁有此養民惠無非報主忠還當
挽河漢滂沛洗兵戎

已上辭達集

追輓樂天王處士五十韻

諱鑑翁字子明
處州遂昌縣人

衮衮多高位寥寥少逸民誰甘棲地僻君獨樂天真直
道追三代行年傍六旬日斜來舍鵬時降踏郊麟兆掩

玄臺舊銘登翠碣新偶然聞善行渺矣悼斯人公族周
家後儒門浙水濱洪鐘鳴義塾封誥出嚴宸累葉承光
耀孤標任隱淪治生盤谷稼寓意漆園椿徐孺高南郡
黔婁禱北辰堂馨萱草雨庭艷棣華春有諾黃金重無
疵白璧純言溫消忿訴恩厚洽宗姻懶應弓旌召常欣
簡袞親先塋培馬鬣宰木護龍鱗孤竹清風古三槐世
德淳髦曾披野雪衣不浣京塵逕鶴隨吟杖淵魚避釣
緡浮雲薄軒冕別墅友松筠靜奕商顏皓酣眠華岳陳

少微占處士太乙降尊神栗里遙辭宋桃源久避秦屢
豐歡未艾嘉遯志彌伸理契六虛易歌吹七月豳鴻冥
託嚴瀨鵲語聽天津句愛仙遊李言排性惡荀夢忘蕉
鹿偽坐狎海鷗馴石髮摩青蘚溪毛洗白蘋屋烏翔子
母塔蟻序君臣方治玩澄碧寒蟾掬爛銀南園花繞屋
北海酒延賓采藥携筐遠看山拄笏頻昂茶浮承腹爐
藝噴猊脣樵牧交盟締兒曹禮法遵龐公不入市孟子
願為鄰楷範傳鄉里威儀列介僎芳蒔芹荀薦幽佩蒞

蘭紉息影林亭樹傷心世路榛晦齋寧淡寂晚節更持
循天運趨溟水人生下坂輪龍蛇報辰已烏兔走昏晨
永訣乖遐壽全歸畢此身嵐霏空勝境霜露慘高旻行
跡留巖壑遺文播縉紳二郎官必做雙節女難倫雅操
猶如昨修名愈不湮孫枝聯五桂家學重千鈞作傳需
良史垂榮等至珍遂昌雲岫冷遙望一沾巾

知新近稿

陶學士集卷四

欽定四庫全書

集部

陶學士集卷八

五至

詳校官中書臣呂光復

中書臣劉源溥覆勘

覆校官中書臣朱鈐

校對官助教臣黃昌祺

校對官中書臣吳俊

謄錄舉人臣周克鵬

謄錄監生臣胡觀瀾

欽定四庫全書

陶學士集卷五

明 陶安 撰

七言律詩

喜秋雨

十六歲時見太平監郡馬公昂夫承命面賦喜秋雨詩用七言律秋字韻

甘雨知時不待求，使君心事與天游。
一時潤澤知無價，千里歌謠慶有秋。
山色洗青當郡舍，稻花垂白亞田疇。
作亭曾見東坡記，名筆如今出品流。

輓方兼山先生

名桂發晚號懶窩

家世淵源漢太常鄉閭德望魯靈光蒼顏白髮今何處
老竹枯芸尚滿堂物外懶窩閑晚境濠東小圃瘁秋香
深衣社裏前修遠士類相逢重感傷

老竹枯芸
懶窩記語

送牟景陽

清才曾贊玉堂臣婉畫旋登閭幕賓蜀郡衣冠家譜舊
河陽桃李政聲新驪珠落紙成文富鯨浪飛艍督漕頻
正是前賢遺愛地摩挲蒼蘚認堅珉

其祖牟忠清公嘗
知太平有太白脫

韓圖山谷返
棹圖石刻

送沈掾還鄉

華辯風生動四筵公侯禮貌重留連江南作客千餘里
幕下淹才數十年荒徑菊松陶令酒行囊書盡米家船
故山莫訝歸來早染就恩袍又着鞭

呈謙齋內翰

累朝耆舊著勲名行處農民鵠頌聲清畫玉堂雄灑翰
暮年金鼎倦調羹江南久愛溪山好天上曾依日月明
袖有濟人醫國手更聞帛壁召還京

次韻前進士唐仲文登黃山詩

獻策當年動玉音，雲霄舊路復追尋。
江山聊寄登臨興，草木猶知撫字心。
菊意漸香螃蟹實，松陰乍冷鶴猿吟。
荒巖醉訪歌臺迹，雨長苔花翠濕襟。

采石晚渡

殘霞遠樹水雲中，淮甸江鄉有路通。
沙影分開晴浪白，櫓聲搖落夕陽紅。
風前宿鷺投疎葦，岸上征人望短蓬。
幸有蛾眉解迎客，無勞更歎暮途窮。

輓嚴厚齋

字國用

皓首衣冠壽七旬全歸無憾見真淳
濟人德厚黃承事教子功深竇禹鈞
月夜返魂香已斷雲山埋骨地方新
忘年交契今難得東望藍橋一愴神

次張孝夫述懷韻

名源歷仕風憲剛直人也

芙蓉池館得秋多深巷渾無俗客過
河朔明星遙拱極街衢尺雨任揚波
牙冠風采當重整駒隙光陰有幾何
坎止流行隨所遇暫時留憩白雲窩

次韻秋聲

忽然金氣撼山林響應天機捷似砧隨處西風能觸物
當空明月獨知音乍涼不寐偏盈耳靜夜長鳴雜鼓琴
應是蓐收嫌寂寞做成商調答清吟

郡史林景山見寄賡縣尹王庭槐詩因次韻二

首一簡王尹林掾一以自述

客中相遇最相知官務紛紜理亂絲井邑近來多惠愛
簿書老去少奔馳換鵝墨妙公餘事放鶴籠虛客到時

守分不踰為上計世情機巧却成癡

燈下功勤老硯知何時心緒似遊絲一天細雨侵人冷
半世流光背我馳溪屋且宜捫蝨話海波未是釣鰲時
偶然自得忘言處默坐書叢絕類癡

送師魯倅廬城

金斗城堅淝水流淮西重地控衿喉屏星勤駕常侵曉
鬢雪新添獨耐秋橋板照波飛騎遠弩臺過雨老僧游
但令民物沾恩澤田里熙然共解憂

送劉仲彬

天塹僅同衣帶水，霎時搖過渡頭船。
半簾霜月留孤館，兩岸江淮共一天。
鏡裏年華催綠鬢，屋西山色擁青氈。
月娥裁得緋衫就，桂子風高待着鞭。

送艾秀才赴京二首

太液三山駕碧鰲，五門遙望鬱金袍。
虞廷詩樂夔功盛，漢殿賢良董策高。
塵散海橋觀白象，酒香官務薦黃羔。
椿翁近在詞臣選，親聽當朝說鳳毛。

天祿青藜照夜深
校書重喜得劉歆
牙牌帶月趨樞殿
馬轡牽春過柳林
照眼西山懸屋角
近人北斗在天心
新年忝預南宮試
把酒論文擬盞簪

送奉使宣撫護都右丞

時過太平

面承天語出京華
春滿江南百萬家
碧落雲開懸月鏡
青山霜晚避雷車

太平之名
山曰青山

恤刑宛合虞朝典
道遠如

乘漢使槎原隰咨諏
王事畢歡浮玉色
見褒嘉

送天門山長孫伯明歸富春

熱官何似冷官尊
講席橫經聖道存
春雨蛙鳴聞鼓吹
晚潮魚上富盤飧
亭松滴翠籠書榻
池藻吹香度戟門
莫學嚴陵便歸隱
詔黃換取被新恩

探梅

東君消息乍來時
訪問江頭慰所思
踏雪且行新霽路
向陽應有半開枝
遙知暖意回苔榦
驚喜寒香度竹籬
又恐重來花爛漫
細看蓓蕾最相宜

輓戴母劉氏

旌德縣大族

梅花愁滿雪寒天無計能留住百年禮義防身閨閫肅
誦絃盈耳子孫賢銀綃錫命旌高壽玉樹藏輝慘暮烟
列女傳中名可續詞垣正有筆如椽

題賢母傳

太平縣汪叔志先生作傳

仙尉曾資內助賢寸心貞潔對青天教兒書積千餘軸
守節家居五十年獨對殘燈了機杼不將明鏡照朱鉛
老來福慶人稀有善行垂光太史傳

登高凌歌臺

粉黛香消輦路荒
雨晴菊意媚重陽
長江落木秋無際
短帽西風鬢有霜
千嶂馬騰環重鎮
萬松龍舞蔭禪房
英雄多被繁華誤
蜀雪湘雲舊恨長

題青田劉氏園亭詩卷

劉履道為太平學正求賦此詩

湖光近接少微星
玄鶴飛來洞不扃
天雨好花開桂苑
地栽修竹似蘭亭
文魚躍水憑欄看
黃鳥吟春隔樹聽
江左芹香解留客
故山有夢繞銀屏

送李生赴金陵

長途雨過息塵埃馬首鍾山隱隱來
李絳須登龍虎榜
謫仙重上鳳凰臺
芸囊冊葉逢晴晒
雪屋燈花冒冷開
志士行藏隨所遇
豈無當路為憐才

輓師魯監郡

龍錦頒恩雨露馨
西風吹得鬢星星
牧民遺澤流南土
開國殊勲起北庭
佳菊滿軒閑酒案
甘棠隨處蔭碑銘
侯封大郡光泉壤
寂寞窮秋老淚零

輓陸茂先

與君數日不相見無病一宵驚已亡伯玉行年方五十
董仙種德異尋常雨荒庭外江山樣烟鎖城西杞菊莊
身後傳家今有托已聞詩禮在賢郎

歲暮即事

慰藉情懷臘酒香光陰背我去堂堂驛梅初破兩三蘂
官歷唯餘五六行斷送殘年多雨雪逢迎老境是星霜
街衢擊鼓驅儼出却喜邦民共樂康

凌歊臺

在黃山山
舊名浮丘

西晉山河決勝秋旌旗捲影入浮丘離宮滿貯三千女
霸國纔攘數十州塔鶴泣雲憐廢迹江鯨噴浪洗餘羞
詩人興逐巴潭遠不道秦關老涕流

蛾眉亭

遠望天門
山如蛾眉

山川一統渺無邊喜動雙蛾黛色妍天地氣通門戶闢
江淮境對水雲連藤烟翠濕靈鰲脊桃雨紅飄躍鯉肩
星斗入簾毛髮冷清樽更弔錦袍仙

觀瀾亭

為監郡清卿賦在蛾
眉亭左監郡所創

江頭下馬俯驚湍，懶把嬌娥作意看。
鯨背風烟詩客遠，酒邊花木醉翁歡。
日斜淮浦漁歌近，秋老吳天雁字寒。
萬頃銀河生脚底，乘槎何似倚欄干。

采石

絕壁高寒天與鄰，倚江樓閣萬魚鱗。
獨招烏幘騎鯨客，豈有朱衣躍馬人。
天塹方今無所限，蛾眉從此不須顰。
荻芽綠嫩河魴上，呼酒花前管領春。

四望亭

在白苧山桓溫歌舞之地，舊名楚山，以其歌白苧遂名。有桓公井。

松聲如訴老桓姦白紵纖歌污楚山南北東西春眼底
古今興廢夕陽間半天荒井泉花碧千載殘基碣蘚斑
萬壑清風掃遺臭野僧雲卧竹陰閑

謝公池

在青山謝元暉宅前

鏡天徹底見纖毫昔日詩翁注硯槽老虎跑開山頂脉
蟄龍送出地中膏藥籬護碧藏星漢茶鼎分香煮雪濤
遙對澄江淨如練我來漱石亦清高

太白墓

墓前有祠蘆如竿竹葉皆有金星

自別金鑾抵夜郎江南有夢到君王
酒酣采石風生袂屋老青山月滿梁
龍管鳳笙遺韻度筆蘆星竹借文章
雲飛荒野苔碑斷時有詩人酹一觴

葆和觀

即元暉宅
有謝公池

曾是元暉舊隱居忽看珠境現仙都
池漚晝涌泉根活巖木秋凋石骨臞
栗殼黃腴猿哺子松巢碧冷鶴溫雛
道人鍊罷芙蓉鼎紫玉簫橫鳳繞梧

三湖

丹陽石
臼故城

三澤茫茫一碧連
白蘋風起棹歌傳
樹頭烟浪浮沈日
水底星河上下天
葦長新沙留雁夢
草鯉斷磧濕蛟涎
何當結屋瓊瑤窟
買取臨隄二頃田

碧雲亭

橫碧雲間千嶂開
風高廢堞雁聲哀
飲殘杯酒不成醉
望斷佳人渾未來
幾欲排雲叫閭闔
便當有路到蓬萊
池蓮對客應知意
帶露盈盈淚滿腮

江東道院

即太平府治

福地渾無案牘塵黃堂清靜控江津仙凡只隔門前水
僚吏常如物外人衙鼓晴敲琪樹曉戟香暖透碧桃春
政平訟簡恩波遠勝讀黃庭禮玉晨

姑孰溪

映帶城隅地勢雄昔稱重鎮大江東萬山中斷飛銀浪
一曲西流臥采虹夾岸樓臺楊柳月對船燈火荻花風
釣魚臺下鷗如雪我已忘機似海翁

有采虹橋及李
端叔釣魚臺

慈姥磯

斷隴橫空鐵骨呈舟行冒險客心驚蒼熊突入半江卧
綵鳳飛來踈竹鳴新港抱山浮樹影怒濤觸石帶風聲
丁蘭廟廢人還葺世遠猶存孝子名

泊吳興

屋覆長橋客艤舟玻璃窟宅冷涵秋塔穿雲表萬松嶂
水注城心兩岸樓列肆晨喧分海錯重簾晝捲起吳謳
玉堂翰墨多遺迹安定祠前更少留

登尊明閣

在江浙貢院有
先聖燕宮像

中和氣象儼如生
下俯吳山一芥輕
葦舍萬間星拱極
棘林四面鐵為城
海潮起立風雷壯
天宇低垂日月明
梯躡青雲重到此
更無弱水隔蓬瀛

宿遷義塘早行

土竈燈殘洗飯盂
旗車帶月駕疲驢
脚添重韉寒如鐵
氣拂疎髯凍結珠
荒塢宿鴉喧雪樹
平田饑鵲啄霜蕪
峒崕漸遠晨光動
野店逢人問道塗

郊城客館晚宿

烟壁風櫺幾歲華
甕漿溫酌當供茶
萼根作菜甜如芋
粟飯登盆細雜沙
病嫗暖煨蘆席炕
小娃夜紡木綿車
掩闌且擁重衾坐
蘇子油燈屢結花

至沂州訪同知彭允誠夜飲鄒平仲馬元德善

仲良在焉

允誠與余甲申同領鄉薦

野人處處頌能官
久別尤當刮目看
清話忘眠將達旦
巨觥連酌不知寒
一時賓主歡娛甚
四海交游會合難
莫負平生經濟志
從來功業出儒冠

沂州紀事

馬蹄踏雪入沂州山擁孤城水左流
瓦甕春浮黃米酒鐵缸凍結紫蘇油
屏車念舊携賓訪閭幕知名遣使留
酌別東郊人滿道餘情未已立凝眸

山東山行至絕頂

地峻清寒刮鬢毛烟林雪麓幾周遭
乾坤萬國風雲濶海岱諸峯日月高
遠堠忽逢心少慰小車難坐足頻勞
蓬萊不隔千餘里便欲飛身踏翠鰲

過穆陵關

層冰積雪蔽巖局絕頂高寒酒易醒鐵壁重圍天設險
石梯萬級地揚靈國家混一無南北州境綿聯別堯青
俯視人間懸絕甚紫微垣近手捫星

益都城北三十里有郵亭名白羊鋪壁間石刻
張夢臣學士詩一首乃至大辛亥未第時所作
其詩曰迢迢長日路途間兩字功名抵死難豈
為身榮愛奔競正綠親老逼饑寒雲霄附鳳心

徒壯客館無魚缺自彈百畝薄田容易辦也應
無夢到長安僕因次韻書事

曉巖路盡困泥間一步猶如百步難漸見雲開天日近
何嫌歲晚雪霜寒客中野飯身偏健車上冠塵手屢彈
最是慈親念游子久無書信報平安

次蒲臺

曉屢集似鳥投林密柵綠墻布棘針冷霧障天雲木暗
暖風着地雪泥深濟流東去長歸海蜀客西來遠貨金

喜遇采江香醞賣一尊見貺慰鄉心

滄州五龍池

帝遣神鱗變化雄圓湫澄碧隱幽宮天浮片影星芒動
地湧靈源海脉通五色蜿蜒遺舊跡一方潤澤溥玄功
我來亦待風雷信燒尾桃花暖浪中

次鯨川

即長蘆

北來州郡謾紛紜喜見連薨挿翠雲萬貨嚮塵人四合
兩州聯境水中分道間晝擁鹽車驥橋左宵屯鼓壘軍

呼酒燈前沾醉後青綾被冷火微熏

立春日至霸州

陽隨脚底鞭寒消行過平堤十二橋官府迎春牛擊碎
車輪輾雪馬行驕草荒高閣存孤壘柳夾通衢接九霄
從此東君當刮目杏花消息到非遥

歲除日至都城

紺霞晨現太陽邊遥望金城萬雉堅路柳陰連三百里
禁花香繞九重天喜看太史頒春曆阻侍慈親守歲筵

拂拭霜衣無旅况御堤塵軟共揚鞭

嵩溪詩會

亭樹陰中共倚欄春雲藹藹出毫端
嵩泉香透銀箋滑溪月清分雪碗寒
官久厭懸龜紐重客來不放蟻觴乾
南歸衣拂京塵污喜見驪珠落玉盤

次韻嵩溪悼馬

帝選龍駒不泛常特搜下土遣王良
躡雲疾足應先逝戀主真情恐未忘
月滿瑤池飛馭遠塵棲金勒舊槽荒

如君自有方臯眼天駟儲精午位陽

瀑布泉

懸流飛落大峯尖千丈中涵萬縷纖河漢機空垂雪練
石巖戶闢掛冰簾白龍倒噴天邊雨銀浪急衝江底蟾
薄暮香爐紫烟散卧聽冷響入松簷

鶴籠

相依蕙帳貯仙禽不似松巢結在林月色穿來窺瘦骨
露華飛入憂清音寬容聊息雙輪翅盤促難拘萬里心

童子放開欣客至孤山祠下迹堪尋

秋江鴈影

西風不動楚波涼倒浸征鴻帶夕陽雲母屏間箏列柱
水晶宮裏字成行紛如鵲映銀河面孤似鸞窺寶鏡光
幾見蘆汀飛起處冷涵數點在清湘

鴻門

寒侵玉帳酒闌珊鐵甲重圍意度閑真命未應遭虎口
至親猶解護龍顏一雙白壁雖歸楚萬丈朱光已滿關

亞父不知仁義主至今遺恨在人間

貂蟬冠

尾裁丹黑螭紋蒼簪插纓垂列廟堂毳錦柔溫搖采弁
翼綃清潔附金璫駁議制度存遺意獬豸鋒稜接後行
台鼎選賢非狗續玉階風露鬢邊涼

晚渡

下馬江頭綠草生蒼童笑指暮潮平得風先送孤舟渡
過岸將為萬里行宿雁隔烟沙際沒寒鴉帶日樹頭鳴

多情最是津亭柳歲歲逢人費送迎

送毛公禮

賢網如天覆九垓擬看展翮起蒿萊膺門世重登龍舉
雄賦人驚吐鳳才歲月辛勤存鐵硯風雷浩蕩接金臺
江南鼓篋忘岑寂雪夜挑燈卷屢開

送小毛秀才

北望潁川雲樹深江南風雨幾沾襟一千餘里遠為客
三百五篇常究心待用能全和氏璧知音未負伯牙琴

論文畫永相忘處
棣萼生輝照士林

御史大夫帖木哥公致仕

正是當今耳目臣
急流勇退足全身
江南開府臨諸道
林下休官見一人
日月旗常功烈著
烟霞窓几性情真
公孤論道思元老
恐有蒲車出紫宸

送李好古赴西臺御史

天花剪玉澡英姿
綠萼梅招夢裏詩
百二山河勞跋涉
九重耳目寄詢咨
錦袍召對金鑾殿
寶墨留題太液池

正值長安花滿路青驄騰踏轡如絲

送張太初赴西臺御史

開國功勞出保州武攻文輔世王侯
星垣柱史承嘉命天府神都紀勝遊
霜草不藏狐兔穴烟花又繞鳳凰樓
驚心時事紛紜甚應有封章告遠猷

送哈德卿赴內臺御史

驄花照地轡絲輕烟柳陰中望禁城
牙角鋒稜新憲節龍頭文采舊儒英
霜飛白簡朝魏闕星拱鑾輿入上京

側耳諫垣聞讜論應須有志在澄清

送曾道士

青牛蹴月五雲京袖得琳書度上清琪樹陰籠玄鶴陞
碧桃香引紫鸞笙踈櫺銀浪浮天影內鼎金丹鍊日精
小別千年飛馭速清風何處步虛聲

送集慶教授博淵泉

四薦科場筆有神三為博士甌生塵江南學校尊昇郡
海內英豪讓國人青鏡忽看霜入鬢玉堂行與月為鄰

臨岐無限留連意已覺風雲滿要津

送江子宜赴京二首

宋相古心族任
湖州安定山長

芹波香接水晶宮老筆生花氣馥雄安定教條行浙右
古心家學振江東書開清畫茶鐺沸官滿多年俸篋空
臺閣知名新有薦輕舟北上趣南風

金水河環萬歲山客中隨友看朝班風雷變化魚龍海
日月東西虎豹關石炭晨炊倉米老土沐寒酌甕醪慳
慈親應有門閭望捧得天書及早還

送陳唯道赴廣東憲史

臺栢相看耐雪霜
天南行役泝長江
繡衣香裏風生筆
綠綺聲中月在窓
海樹迎人馳曉騎
蠻蕉對酒別秋缸
紛紛貨利無心取
時吐嘉謀慰遠邦

秋日述懷

一壠雖冷寄名邦
却愧辭巢燕子雙
風送霜華來短鬢
秋隨雁影落疎窗
甘霖透地晴觀稼
缺月當樓夜聽江
佳客相過常滿座
清貧每欠酒盈缸

送朱叔志

闕里古今唯二處新安地望魯邦同諸賢祠墓遺蹤在
兩族雲仍舊譜通山市醉遊春幔綠溪窓清話夜燈紅
歸來又振龍溪業新額榮光照學宮

漂水湖鄉夏末述事二首

淺碧湖漪沒草萊柳陰坐石浣塵埃流光老我添文債
溽暑酣人却酒盃六月魚龍隨浪起五更風雨送秋來
離家見說門無客烏雀羣飛啄綠苔

是日丑時立
秋風雨大至

江海機心久已灰
白鷗見客莫驚猜
天連一水山浮動
地接三州路拆開
野豎衝炎耘稻去
掉郎唱晚採菱回
征途亦有歸田夢
意恐清盟負菊梅

館中山朝元觀作

自出徵租五十日
朝元閣下首頻搔
客中喜遇故鄉友
秋後自憐疏布袍
老火流空望霖雨
西風入湖飛雪濤
扁舟又欲渡江去
桂影滿身明月高

鎮守太平楊侯致仕

金虎橫腰世爵傳，功成謝事享高年。
營家綠野開方樂，報國丹心老愈堅。
刀劍于今買牛犢，兜鍪自昔換貂蟬。
江城久駐多遺愛，軍政承風尚肅然。

次韻徹通理秋日驛中二首

幾年江海擬同群，又隔鍾山一片雲。
驛路秋高人漸遠，征袍霜重火頻燼。
臺臣鶚薦多知己，天子龍飛舊獻文。
我亦南宮老詞客，何時把臂慰前聞。

驚看冀北馬空羣，閉戶探玄學子雲。
獨念邦家情未已，

何心富貴勢如雲典謨摠是經綸事館閣應需黼黻文
安得燈前一夜話平生傾倒叩奇聞

送鐵元起監歸州

川口通衢熊繹城兒童竹馬走相迎三巴草樹春浮動
萬舸風濤雨蕩平晚市炊烟連白帝曉山旭日射紅旌
政成當入蘭臺選熟路霜蹄上玉京

送李國用赴宗文山長

鷺湖朱陸講道處書院獨以宗文名古今自有易簡理

經註皆同日月明蒼嶂曉蒸鉛水濕黃簾夜度燭烟輕
交承是我同年士為說故人華髮生

前山長孔曉字子充余同榜友也

送東川山長張彥深

去城一百二十里川上化為絃誦林西塾青氈三閱歲
東籬黃菊獨知心鷺車使者裁霜檄鳳閣銓曹傳玉音
我亦檀襟更清淡喜看雲驥驟駸駸

設教于山主陶氏之族

寄宣城學正徐伯初

辛卯秋同考太平堂試

官燭依然淚滿臺望中溪嶂似蓬萊登樓幾度碧雲合

對酒獨看明月來松葉連簷霜後好梅花喜客臘前開
榻釶未覺如冰冷弟子森森育異才

宣城謗云松
連簷出狀元

送黃文敬長岱山

都門烟柳去年時回首文光照島夷
半石琢成司寇像空庠留得侍郎祠
坐看賈舶分鹽利自笑行囊少俸資
最是郡城文獻地不妨來往結相知

輓湯子允

故家積德經幾世此老享年逾七旬
先向蒲塘卜風水

免看淮境動烟塵
雨窓竹石存遺跡
月館琴書付後人
不見瘦筇扶鶴骨
市橋楊柳亦傷神

次韻二首

并序

慈溪劉中可為姚江學官去家無百里其父字隱之因
來視焉天倫至樂藹然庠舍婆娑嬉遊觴詠笑談旬日
而歸適余來後不及瞻承而與中可締交觀唱和諸詩
縉紳傳為美事且教予入官父之志也得祿奉親子之
志也以志養志俱賢矣哉乃倚歌而和之

雨後芹池長綠波
幡然來此聽絃歌
舟輿熟路江頭近
父子歡情客裏多
春館稱觴衣舞綵
晚窓題句扇裁羅
笑看清俸供甘旨
奈此廣文官冷何

石上綸垂碧海波
山中興在紫芝歌
先生閱世身長健
當代求賢意正多
老驥獨能諳步驟
冥鴻全不被羗羅
浙東文物從前盛
如此期頤有幾何

送樊照磨

與庸田官履餘姚
早田回紹興郡幕

都水使軺江上駐
郡僚馳驛共經過
早田官賦今蠲免

屬邑民瘼更撫摩水路歸舟賒月色山家冷竈借陽和
蓬萊清淺神仙府歲晚梅花照碧波

三月三十日費安中山長告別走賦六首

春融壁海講帷開有客携經萬里來天下名人半知己
芹邊冷席獨淹才東湖時雨沾膏壤北斗文星貫上台
回望當年舊遊地蒼茫烟樹隔金臺 右送安中

去年見客問相知射目如何却中眉安定教條西浙盛
堯夫易學後人疑水晶宮裏風烟爽琥珀盃中歲月馳

誰念姚江未歸客蕭蕭詩鬢忽成絲 右寄察德元

南潯鎮裏新文學姑孰湖陽舊世家兄弟從戎多武備
師儒掌教盛才華林巒勝處春攜屐風雨聲中夜煮茶
去歲相逢便相別故人千里寄漁槎 右寄邢彥賢

雪水雨中曾共飲錢塘秋半又相逢可憐過眼日五色
還欲扣關天九重才似襴衡當薦鶚識如太史更登龍
偶因人去傳消息見說盈門士子從 右寄金仲宣

我本江東一布衣十年較藝到京畿欲從彭澤尋歸路

且學嚴陵坐釣磯
山月度牆窺冷榻
海潮帶雨過晨扉
天台客至因留話
一笑揮盃興欲飛
右述懷

來自東郊曾遠迎
今朝有意惜君行
落花風裏一杯酒
芳草天涯幾日程
正欲園林娛賞興
又教鶯燕動離情
臨岐預約相逢處
信到梅梢白玉英
右送春

甲午六月旦日登嶼山觀海

脚底潮生鼓萬雷
浪頭隱隱白雲堆
諸州地到海邊盡
外國帆從天際來
但見中間浮島嶼
不知何處是蓬萊

平生登覽今朝最
髣髴珠宮貝闕開

送豐叔良

雨添新水長蒼芹
一片書聲隔屋聞
講席青氈留傲兀
官倉紅米代耕耘
諸侯賞識璫璣器
學子爭傳錦繡文
自是冷官難久住
出門有路踏青雲

送戴生

姑孰亭前綠藻肥
會稽山上白雲飛
四郊兵氣頻聞警
一榻燈光只夢歸
舟子爭潮喧熟路
海魚修饌奉重闈

姚江在望渾非遠肯踏梭船訪釣磯

送湖北憲僉亦普剌金

金斧霜威壓將營烟塵不犯石頭城當朝天子為知己
列郡鄉民搃習兵鄂渚山川何日到于湖風浪一時平
舟師好渡螺磯去江上游氛易得清

送太平路同知王庭珍

隔江塵起動邊聲采石波濤夜不驚台鼎調元延世賞
倅車佐守厚民生近來壁壘添烽火未見天河洗甲兵

月滿空船歸思切望中桑梓是東平

送馬仲雲

兩浙繁華第一州官情更喜挈家遊吏曹環立看揮筆
明府相過聽運籌雪水晴浮金板舫虹橋春躍紫花驄
羽書近日傳邊警未暇絃歌醉酒樓

壽大本監郡

四月清和當望日壽星光滿太平城香凝燕寢諸侯貴
鼎鍊龍丹九轉成循吏傳中書治行列仙籍上注長生

綠陰亭館薰風爽玳瑁筵前進玉觥

賀郡守靳處宜病起

病中猶不廢承宣卧治江城搃晏然自是憂民勞守相
正綠換骨作神仙雲間老鶴精神健雪後寒松節操堅
今日朱轡乘興出歡生童叟擁街前

清和

輕爽新暄皆可人四時佳候一時均渾無寒氣渾無暑
半似秋天半似春滿地槐陰連曲徑透簾日色度芳塵

伯夷下惠能同調畫永從容樂意真

壬辰清明日客有携酒城東邀陳致中謝行可
程子舟馬希穆及余遊月盤洞天偶遇張文泰
遂同飲歡甚行可以老杜清明二詩次韻紀事
因就韻賦

千門插柳綠含煙陌有輪蹄水有船花下酒盃堪獻酢
松間山路更攀緣仙童見客頻留坐飛鳥依人每可憐
席展園亭穀雜進粥香鄰竈火新然有閑愛結漁樵侶

無術能飛子母錢自笑勞生空擾擾欲求鼎藥為延年
閉門且免走西東時事無聞絕似聾幾處干戈猶不息
一春桃李又成空唯餘山水長清麗未見車書遽混同
冷節傷神登墓道禁鐘未夕慘江楓青山舊宅南歸後
白日浮雲北望中欲效微才今未用滄波甘分釣魚翁

出金陵望茆山

蔣山過後見茆山翠幄三峯異世寰方士虎騎崖洞出
伯仙鶴跨海天還劍光夜照星辰白丹氣春騰草樹斑

欲覓隱居吾鼻祖松風樓上聽潺湲

過平江

錫山回望望亭孤
百里風烟遠入吳
虎阜雲開晴見塔
楓橋月落夜聞烏
依依楊柳環新郭
渺渺波濤接太湖
可惜捧心人去杳
大夫遺廟鎮姑蘇

岳王墓

十二金牌發帝宮
儘憑讒舌害元功
君臣樂土偷安遂
父子邊庭屬望空
莫掩青山千載恨
常懸白日寸心忠

英靈只在棲霞嶺塚樹無枝偃北風

寓姑蘇半塘寺

息程來借贊公房暫泊扁舟向石塘苔逕烟蘿浮竹翠
風簷花雨發天香僧依法座持僊梵人扣禪機入道場
明訪虎丘應不遠雲邊樓閣擁青蒼

虎丘

海湧危峯翠拂天瘞來池劍化蜿蜒樓臺隱映王珣宅
樹石荒涼陸羽泉古塚月明無踞虎芳林春盡有啼鵑

名山勝境關情久祇為尋登一繫船

毘陵道中

孤帆斜日領舟行遠道無山為送迎
沙店疎籬堪問酒烟村高樹不聞鶯
一灣野水鷗波靜到處蘋香客思清
莫嘆飛蓬類蹤跡成名自昔在書生

復至金陵

望裏鍾山擁翠螺金陵道上又經過
韶華信比當時盛親舊原非向日多
紫陌塵飛金勒騎紅樓酒醉玉人歌

獨憐卞壺名忠節汗竹千年耿不磨

除教職

孤劍頻年兩鬢殘飛騰每切寸心丹
喜持黃紙新除重那厭青氊舊業寒
楊柳晚風嗟客路聖賢心事付儒冠
也知衿佩相親處日與敷宣坐講壇

秩滿避亂

冷官醫舍數年過秩滿其如世亂何
衿佩有誰談禮樂民生徒欲避干戈
歸閑故里青霄遠卧病衡門白髮多

江上薜蘿烟雨裏何時重聽太平歌

世氛久未息書悶

開極規模自有初舊章倣擾竟何如
原頭烽燧誰為息海內兵戈孰可除
偃月堂深資鬼蜮伏波軍老縱鯨魚
疇能一吐平淮策與爾排雲謁帝居

重至金陵喜熙朝建都

聖王開極坐金鑾整頓乾坤始得安
景運河清并海晏江山虎踞更龍蟠
四方寶貨梯航至百辟衣冠雨露寬

從此昇平千萬載黎民擊壤罄交懽

送孫伯融摠制赴括蒼

遠攜行伍定安危況子才高邁等夷勇息煙塵今日計
道經邦國古人為撫綏黎庶通恩澤裨闔風雲刷羽儀
丈武功臣頭尚黑熙朝重見太平時

寄劉伯溫宋景濂二公

水溢中原又旱乾風塵從此浩漫漫東山好慰蒼生望
南國那容皓髮安要整綱常崇黼黻還成文物萃衣冠

聖賢事業平生志幽樂何須戀考槃

喜伯溫景濂輩至新京

束帛徵賢出礪阿來從明主定山河
攄才要濟邦家用為治當調鼎
鴈和定見百年興禮樂先從四海戢干戈
當朝輔佐侔伊呂汗簡芳名耿不磨

哭孫伯融

陸梁未息竟亡身誰為祛除四海塵
幣帛敬惟招俊乂死生端只念君親
丹心故國江楓曉白骨他鄉塞草春

不是交游重相感幾多悲感為斯民

龍江閱兵

諸將桓桓總虎熊戰船部位列兵戎
白虹光射腰間劍青鵲膏塗臂上弓
千里生民應按堵陸梁小醜定潛蹤
戎衣一着天山定文德由來濟武功

康郎山應制

閶闔鳴韶發羽旄群峯青迓鬱金袍
臣民喜覩天顏近車駕遙臨地位高
警蹕飛簾經梵剎行厨光祿進仙桃

真龍到處多奇勝風捲雲松沸海濤

送夏允中總制浙東兼巡撫

洪武初元

九五龍飛始建都廷臣領命出分符
要叅將相施韜畧
直使山林盡兔狐
鐵騎曉騰霜氣肅
玉笏夜奏月輪孤
皇仁遍布東南境
綏恤羣黎萃版圖

已上辭達集

陶學士集卷五